

開原縣志

全
自第


冊
三

98
冊

函
4819

4

92035



藝文

上古結繩而治後世易以書契而文始興繼此以往文化日開利用等於藝術杏壇立
 教通六藝之文者竟不乏其人而三代之治功百家之學說胥借文字以傳其用可謂
 宏矣漢唐以降重經義尙詩歌著述愈多體裁愈備惟文風之發展以揚子江流域爲
 最優東省居黃河流域之北開化遠遜於內部開原又東省之一隅以語藝文詎容矜
 詡况更載之鄉史垂示將來乎顧籌策不容忘遠記事要貴存真以至風雅謳吟絃歌
 譜曲但有片長足錄即可稱下邑之文徵豈爲誇文章華國之榮博著作等身之譽哉
 蓋將以本地風光備他年之考據焉耳

1184

藝文

專制時代君臣之分綦嚴或勢兼壓抑或意涉逢迎文字中固不免也然所言閭閻之利弊灾患之賑卹政治之改良邊備之繕修等事確與民生問題有連帶關係此亦有可記載之價值也擇而登之以見我開邊遠未嘗不爲歷朝所注重此後風化之轉移地方之利病當局者益當加之意焉

勅諭疏議

金

諭東京諸路詔

金太祖

頃因兵事未息諸路關津絕其往來今天下一家若仍棄之非所以便民也自今咸顯東京等路往來從其間被略及鬻身者並許自贖爲良仍令馳驛布告

明

勅鎮守總兵官

明宣宗

皇帝勅諭今命爾挂印充總兵官與太監一同鎮守遼東地方整飭兵備修築城堡操練士卒申嚴號令振作軍威遇有賊寇相機戰守凡一應軍機之事須與鎮守巡撫等官從長計議停當而行不許偏執已見乖方誤事况遼東近來兵備廢弛軍士艱難而守邊官軍又或貪功生事啓衅召怨以致虜寇讐報不已邊人荼毒地方疲憊與先年不同爾爲朝廷武臣受茲委託務須與鎮撫等官用心逐一整飭不可視常玩忽尤須持廉秉公正己率下毋得徇私貪利擾害下人及輕舉妄動致貽邊患如違罪不爾宥其慎之故諭

勅巡撫都御史

皇帝勅諭今特命爾巡撫遼東地方贊理軍務訓練軍馬整飭邊防提督糧儲禁革一切奸弊務使軍威振舉糧餉充足衣甲鮮明器械鋒利城堡墩臺邊牆無不完固以防禦寇賊撫安兵民有警則公同鎮守總兵太監等官調度官軍相機殺賊禁約管軍頭目不許科擾尅害及隱占私役有誤戰守違者輕則量情懲治重則毋畏勢豪徑自參奏拏問其餘一應邊務聽爾便宜從事與鎮守等官從長計議而行况今遼東地多疲憊軍士艱難

守邊官行事乖方以致地方不靖爾爲憲臣受茲委任宜持廉秉公安靜慎重凡軍民利病可與可革者悉心訪究從宜審處具實奏聞務使地方寧謐內外警服毋視常怠忽及乖正誤事自取罪責爾其勉之慎之故諭

勅開原兵備道

先該給事中林廷學奏稱開原地方二衛孤懸三面接虜邊情叵測人民玩野弊端易積詐僞橫生宜設兵備以懲夙蠹等因下該部議擬已行鎮巡等官會題相應改設今特命爾住劄開原地方整飭遼東等處兵備修理墩牆操練軍馬撫恤士卒問理詞訟禁革奸弊一應合行事宜悉照該部提准事理施行仍聽巡撫官節制爾受茲委任尤須持廉秉公正已率下務俾奸究屏跡軍民安堵邊境無虞斯副任使如或怠忽誤事責有所歸爾其慎之故勅

勅遼東副總兵

皇帝勅諭都指揮僉事韓永慶今特命爾充副總官兵住劄遼陽地方管理清河鹼場馬

根單孤山一堵墻散羊峪撫順會安東州瀋陽靜遠平虜上榆林蒲河十方寺長安長靜
長甯長定長勇長勝武靖營奉集威寧營二十五處營堡平時操練軍馬修理城池撫恤
士卒防禦虜寇有警哨備收斂相機堵勦如遇報有大警開原海蓋二參將瀋陽高平二
游擊所管兵馬悉聽調度分布截殺無事各令照常防守城池如開原海蓋瀋陽高平險
山等處有警爾不必聽候鎮巡明文徑自提兵策應若會兵勦賊仍聽總兵官節制調遣
爾尤須持廉秉公圖稱委任如或黷貨虐下致悞邊事法不輕貸爾其勉之慎之故勅

清

諭刑部 康熙二十一年

清聖祖

頃以逆寇殲滅海宇蕩平朕躬詣盛京展謁永陵福陵昭陵以告成功因而巡行邊塞咨
詢民間疾苦東至吉林地方見其風氣嚴寒由內地發遣安插人犯水土不習難以資生
念此輩雖干憲典但既經免死原欲令其生全若仍投畀窮荒終歸陪斃殊非法外寬宥
之初念朕心深爲不忍以後免死減等人犯俱著發往尙陽堡安插其應發尙陽堡人犯

陽不支遼陽不支畿輔之地豈能宴然也哉臣慮及此不能不爲之寒心也計今開復舊路墩空城堡瞭守官軍往來道里可減三之二其山澤之利舟楫之便肥饒之田豈勝言哉又以形勢大略言則錦義爲西路廣寧爲中路遼陽爲東路開原爲北路酌量遠近聯絡聲勢隨機應變彼此相援誠如長山之蛇首尾相應遼疆可擬磐石矣一原設各城沿邊墩臺自廣寧起至開原平頂山止延袤八百餘里該牆一十四萬四千丈墩台三百六十五座瞭守官軍一千五百四員名若以新展垣牆算過三百餘里共牆五萬四千丈沿邊該設墩台每二里立墩一座共台二百五十座大台五十座小台一百座餘下墩台一百一十五座一開原地方平頂山官起至廣寧地方碁盤山墩止沿邊按馬營堡二十處共操守馬步官軍舍餘四千八百一十一員名一今新展城堡止用五座立二所三跼腰角台四座

謹華夷以弭邊患疏

禮科給事中郡人傅 鏞

窃見遼東地方與三衛建州諸夷相接廣寧開原馬市與彼交易所以羈縻謂夷而使我

中國也奈何往年各處地方官軍往往與賊私交洩漏軍機且又專事進賞不振威令賊既通和時常進我邊牆射獵牧放用得知我山川險夷城堡虛實道路遠近所以深入腹裏動輒得利只宜設立馬市定處許之交易仍嚴加防範示以恩威各邊所賞夷人俱要節省令遠去百里之外封表山川住牧禁約不得近邊凡到墻下便是犯邊就令台軍傳報着令官軍即時驅逐守邊官員若再似前縱令入境牧放即問擬守備不設罪名

會奏裁革內臣疏

巡撫都御史 潘
巡按御史 朱 孔 珍

竊見遼東鎮守內臣永樂間始於王彥彥父薩理蠻率衆內附從征所向有功因責王彥以撫東夷監鎗內臣始於宣德三年太監楊宣管收神鎗開原分守監臣始於正統二年改楊宣以充任以後遂成故事相沿差委本鎮密邇畿輔僻在東隅軍民餽餉全仰輓運不滿千里而內臣三員其何以堪且監鎗所司止於一事又與鎮守同居一城原領鎗銃多給城堡自有主者知所慎重所謂監督不過簿書冊籍會計數目耳開原雖稱要害而逋逃困於徵求精銳銷於剝削行伍凋憊屯堡空虛且又監丞叅將朝夕共處嫌隙易生

見有異同動失機會况夫承平既久國勢日張原無宣大之虜情幸有馬市之繫束撫剿苟得其道控制或可無虞官多民擾在在爲病而窮邊尤甚鎮守之設無補地方之安危徒費歲月之供億以上各官所當裁革兵部議復是年革去監鎗及開原分守鎮守仍舊

使朝鮮回奏 節錄其一

修撰龔用卿
給事中吳希孟

題爲陳邊務因邊疆以圖長治久安事臣等奉命詔諭朝鮮於遼東地方往來經歷凡人情土俗安危利病見之頗真知之頗熟謹以有關地方者離爲五事伏乞詳議施行一增築邊城以備虜患訪得遼東地方自廣寧至開原舊有陸路不過三百餘里洪武永樂年間海運邊儲船隻直抵開原今開原城西有地名曰老米灣是也正德年間始立邊牆故沿河迤裏隨河之灣曲築壘設墩延長八百餘里致將河套之利委棄牆外爲寇賊之資達虜肆意南侵深入腹心諸墩台瞻顧不支渙散不一竊謂自廣寧至開原舊路宜因時修築以八百里之兵力爲三百里之守則用力專以八百里之城垣守三百里之地則地形簡專則不分簡則易見地有餘利人有餘財兵有餘勇算之上者也

清

敬陳奉天邊地情形疏

順治丁亥

張尙賢

盛京形勢自興京至山海關東西千餘里開原至金州南北亦千餘里又有河東河西之分以外而言東北起開原由西南至黃泥窪牛庄乃明季昔日邊防自牛莊由三岔河南至蓋州復州金州旅順轉而東至紅嘴歸復黃骨島鳳凰城鎮江鴨綠江口皆明季昔日海防此河東邊海之大略也河西自山海關以東至中前所前屯衛後所沙河寧遠連山山杏山松山錦州大凌河北面皆邊南面皆海所謂一條邊耳獨廣寧一城南至閭陽塔平十三山站右屯衛海口相去百餘里北至我朝新插之邊相去數十里東至盤山驛高目沙嶺以至三岔河之馬圈此河西邊海之大略也合河東河西之邊海以觀之黃沙滿驛一望荒涼倘有奸宄暴發海寇突至猝難捍禦此外患之可慮者以內而言河東城堡雖多皆成荒土獨奉天遼陽海城三處稍成府縣之規而遼海兩處仍無城池如蓋州鳳凰城金州不過數百人鐵嶺撫順唯有流徙諸人不能耕種又無生聚隻身者逃去大半

改發遼陽安插至於反叛案內應流人犯仍發吉林地方令其當差不必與新披甲之人爲奴以昭朕軫恤民隱哀矜保全之意爾部即遵諭行

諭戶部

康熙三十三年

盛京等處去年禾稼不登粒食艱窘聞今年收穫亦未豐稔米穀仍貴儻價值日漸翔涌則兵民生計恐致匱乏盛京等處地方關係緊要朕心時切軫念宜預加籌畫作何恩給俾各資生着遣部院堂上官一員前往自甲兵以及匠役價差人當有力不能餬口者將人戶數目察明造冊具奏

諭州縣

雍正元年

朕惟國家首重吏治爾州牧縣令乃親民之官吏治之始基也貢賦獄訟爾實司之品秩雖卑職任綦重州縣官賢則民受其利州縣官不肖則民先受其害膺茲任者當體朝廷惠養元元之意以愛民爲先務周察部屋綏輯鄉里治行果有其實循卓自有其名非內聚賄而外干譽謂之名實兼收也全省吏治如作室然督撫其棟梁也司道其垣墉也州

縣其基址也書云民惟邦本本固邦寧夫所以固邦本者在吏治而吏治之本在州縣苟州縣之品行不端猶基不立則室不固庸有濟乎皇考臨御六十一年灼知州縣之重特行引見咨詢明試至詳且慎其廉能之員每不次超擢以示鼓勵今海內羣黎皆皇考所懷保也朕膺宗社重寄思繼治功惟爾州縣諸臣具有父母斯民之責其爲朕立之基址以固邦本焉誠能潔己奉公實心盡職一州一縣之中興仁興讓教忠教孝物阜民安刑清訟簡朕將升之朝宁用作股肱如罔念民瘼恣意貪婪或朘削肥家或濫刑逞虐或借刻以爲清或恃才而多事或諂媚上司以貪位或任縱吏胥以擾民或徇私逞欲以上虧國帑王章具在豈爾貸歟更有任州縣時私肥己橐而漫云且俟顯要方立名節者其與初市清名晚而改操者何以異哉至於錢糧關係尤重絲毫顆粒皆百姓之脂膏增一分則民受一分之累減一分則民沾一分之澤前有請暫加火耗抵補空虧帑項者經皇考示諭在廷不允其請爾諸臣共聞之矣今州縣火耗任意加增視爲成例民何以堪乎嗣後斷宜禁止或被上司察核或被科道糾參必從重治罪決不寬貸夫欲清虧空之源莫

如節儉正直節儉則用無不足正直則上官不可干以私若腴小民之生以飽上官之貪欲冒不測之罪以快一時之奢侈豈砥礪廉隅爲民父母之道乎爾州縣等官其恪共乃職勿貽罪戾毋謂地遠官卑不及察其賢否也特諭

諭教士子責成學臣教職

雍正四年後半不錄

爲士者四民之首一方之望凡屬編氓皆尊之奉之以爲讀聖賢之書列膠庠之選其所言所行俱可爲鄉人法則也故必敦品勵學謹言慎行不愧端人正士然後以聖賢詩書之道開示愚民則民必聽從其言服習其教相率而歸於謹厚或小民偶有不善之事即懷愧恥之心相戒勿令某人知之如古人之往事則民風何患不淳世道何患不復古耶朕觀今日之士子雖不乏閉門勤修讀書立品之輩而蕩檢踰閑不顧名節者亦復不少或出入官署包攬詞訟或武斷鄉曲欺壓平民或違抗錢糧藐視國法或代民納課私潤身家種種卑污之事難以悉數彼爲民者見士子誦讀聖賢之書而行止尙且如此則必薄待讀書之人並輕視聖賢之書矣

奏疏

明

奏復遼東邊事疏

巡撫御史

李

善

窃見遼東邊事疲敝臣至遼陽開原詢及故老皆云宣德年間本鎮初無邊牆時唯嚴瞭望遠烽候海運直通遼陽鐵嶺以達開原故開原城西有曰老米灣者又舊行陸路自廣寧直抵開原三百餘里先年燒荒東西兵馬會合碁盤山東北至開原平頂山中有顯州廢城遼之中京肥饒之地不下萬頃自畢恭立邊後置境外邇來三衛夷人肆意南侵漸入猪兒山老虎林遼河套等處假牧潛行伺隙入寇邊方爲害甚於昔時且沿邊地多平漫土脈鹹鹵遞年春秋徵夫四五萬名糧餉萬石無益邊防徒勞人力初計所恃者遼水爲險也夏旱水淺虜騎可涉冬寒冰凍如履坦途抄掠人畜不敢耕牧遂致田野荒蕪邊儲虛耗仰給京運見今道路隔阻遼河又兼盤山牛庄低窪天雨連綿水輒泛溢行旅阻隔萬一開原有警錦義廣寧之兵何以應援且遼東孤懸一方番漢雜處遼河失守則遼

略有家口者僅老死此地實無益於地方此河東腹裏之大略也河西城堡更多人民稀少獨寧遠錦州廣寧人民湊集僅有佐領一員不知於地方如何料理此河西腹裏之大略也合河東河西之腹裏以觀之荒城廢堡敗瓦頽垣沃野千里有土無人全無可恃此內憂之甚者臣朝夕思維欲弭外患必當籌畫隄防欲消內憂必當充實根本務宜設下添兵屯田廣儲以圖久遠之策

條議

明

設立邊備以撫西夷議

開原兵備僉事 黃九成

看得開原慶雲堡離城四十里舊守堡官一員官軍二百九十員名每遇福餘衛夷人入市叅將同馬市備禦官帶領人馬前去撫賞然開原南市猶有海西交易今乃悉衆專撫西市不免顧此失彼萬一點虜譎詐乘我不備或生意外之虞雖有智者亦不能爲之謀矣且慶雲堡兵馬自災荒之後逃亡過半而乃以一堡單弱之卒抗三衛鴟張之虜誠可

寒心合無於慶雲堡添設備禦一員古城鎮夷永寧俱屬管理專一住劄慶雲堡撫賞西夷招募精銳軍士五百名易買臚壯馬五百匹當年給安家銀五兩次年二兩三年一兩照數題請給發蓋立營房安插家小近堡閑田任其耕種五年之後量爲起科其月糧馬料賞賜就於近年清出逃故倒死軍馬銀內支給其軍士馬匹就於進貢夷馬內俵給如有不敷動支官銀易買期以半年事當就緒然慶雲一堡地方窄狹前項人馬必須分駐各堡方爲便益慶雲堡住劄二百名匹通舊四堡人馬共有一千餘名匹責令慶雲備禦時加撫恤訓練平居則修理戍務遇警則往來截殺備禦既設軍馬募完如夷人入市衆多叅將馬市官前去慶雲同本堡備禦撫賞留開備禦帶領左哨人馬存駐開原以防南市遙爲聲援如此不惟可以彈壓西夷之心亦可以震警東胡之膽是亦保邊禦虜之一策也

添設兵馬以防東夷議

前
人

看得開原地方爲遼之極北南至瀋陽二百里去遼陽三百二十里去廣寧六百八十里

三岔渾河之泥濘不計焉道路既遠緩急之際應援實難開原參將舊額人馬五千員名近年迭遭兵荒馬步止有三千餘員名疲弱者亦居其半是地方危險莫過於開原兵馬之消耗亦莫甚於開原也如海西夷人節年進貢目前之計固若無虞然帝王之治安不忘危未然之防尤當深慮說者曰鐵嶺添設精兵二千備禦改爲守備仍聽開原叅將節制南可以接瀋陽北可以應開原彈壓外夷之心壯我華夏之威似亦有見而竟莫之行者豈非以事大難舉時憚興作乎職以爲二千兵馬一時難募且招募精銳軍士一千名安家銀五兩照例初年五兩次年二兩再次年一兩照數題請給發應有糧賞該道會管糧郎中議處就於各衛哨扣除還官銀兩支給馬匹動支官銀易買務要臚壯堪以征戰料草行移管糧衙門查給其備禦名銜改爲守備令其時加訓練以爲南北聲援如是聞風畏服永堅效順之心矣

條議

一處馬騾之價訪得各驛軍士貧者居多供應公差之費已爲不貲而又責之買馬何以

分守道
右參議

張邦土

堪命此所以日就逃避而不復返也查得開原撫順二關每年責馬一千五百匹舊例給軍騎操率皆瘦小不堪實用合無於內撥五百匹每匹估銀二兩着給開原馬市官及撫順備禦官召人易買一年可得銀一千兩酌量踰衝緩人力厚薄分發高平小凌河等名驛每軍領銀五兩收買臙壯騾一頭各赴該道衙門驗印走差則價出自官而貧軍免買馬之費矣

清

遵旨會查奉天各屬應修城垣議

乾隆戊戌

于敏中

本月初八日欽奉諭旨盛京爲本朝王迹肇基之地朕恭謁祖陵道出山海關經過各處城垣多有坍塌殊不足以壯觀瞻而資捍衛著軍機大臣會同將軍弘晌查明何處最爲緊要應行修築妥議具奏候朕發帑興工并派員稽查督辦欽此臣等伏查奉天各屬惟盛京城垣每年立有歲修章程現在崇墉完固無庸修葺外其餘各屬城垣俱久未繕治實多傾圮其必應修築者共有一十八處但各城同時鳩工興作工匠既恐不敷稽查亦

難周到臣等公同酌議請就應修各城分爲三次修葺先將駐有官兵之錦州熊岳鳳凰城並大路經行寧遠州廣寧縣遼陽州六處較爲緊要者爲第一次次將中前所中後所巨流河義州鐵嶺開原縣六處爲第二次又次將撫順海城縣岫巖廳蓋州復州金州六處爲第三次其餘屯衛堡驛雖舊有城垣而地方僻小無關緊要者均勿庸修葺並請簡派督辦大員隨時往來稽察並遴派熟諳工程之員每處一人會同將軍臣弘昫及府尹督率各屬估計工料奏明請帑擇日興工仍各預行度地開窰燒造磚料務期厚實堅緻足資鞏固所有臣等遵旨會同酌議緣由謹繪圖繕摺具伏祈睿鑒

孔子廟庭復祀盧植議

馬宗薌

聞之施法於民先王以入祀典

見禮記祭法

教學之師及死猶祭瞽宗

見周禮大司樂

崇德與功禮則然矣

盧植少從馬融受古學作尙書章句三禮解詁上書請裁定聖典刊正碑文

見後漢書本傳

植所著

書隋書經籍志舊唐書經籍志皆列其目于今則亡而孔穎達禮記正義據采多條

凡二十九條

其義異鄭毛詩孔正義續漢書禮儀志杜右通典於植之注亦多援引此古學之大師傳

經之巨子與鄭司農杜子春等同有扶翼之功宜在從祀之列遭漢中微效命平亂而抽刃嚴閣之下追主河津之間大義昭然世臣愧之矣鄭玄以經師列廡諸葛亮以純臣見祀比之於植弗能遠過有唐貞觀盧鄭從祀廟庭及明嘉靖盧鄭改祀於鄉清雍正時鄭君復從祀矣盧君則不與焉今者書禮之經得注益明從祀之典缺而未續背乎祭法異于周典非以崇德無以勸學此稽古之風所由衰由禮之行所以黜也夫悍患之兵士一鄉之先生春秋之祀褒崇不廢似此大儒宜祀兩廡位與鄭並祭從丁祀庶乎巒序瞻禮有所激發風教之行可以歸厚矣

上開原縣監督保公輔宸書

光緒三十三年三月

邑紳

徐文華

爲任差伊始謹擬進行方針懇

恩鑒核飭遵事竊以我開創辦學堂及今兩閱冰霜

乃調查城鄉各校寥落仍若晨星豈真風氣難開歟抑亦掌教育者無術指南盲行於五里霧中爾華當奉委以來自度蚊負難勝蠹窺易悞晝夜焦思略獲端緒試熟數之於前乞詳擇焉查本邑學欵歲入祇五萬吊歲出竟達十萬吊於此而言興學誠爲無米炊矣

然底欸五萬之息圍荒五方之租均可價增倍蓰而出口之實糧以及船道倉地各捐倘能派員經收無一不大增進欸况期糧捐局每糧百石抽附加捐錢五吊經陶前任稟准抽提一吊撥歸學費又車捐雖改統捐經前任楊公稟准督憲暫給一千元此二項批准之巨欸實能敷常年之用惟財政局尙未議覆而楊公又值交卸遂致擱淺若監督據情申詳仰邀允許則學欸源源而來矣然此城內官立各校之欸也至四鄉公立各校其款向出於地捐查本邑旗民各地每日抽捐一角以十枚計僅以四枚歸學堂偏枯莫甚焉擬請與警務平均增爲半角且以二枚歸各屯以三枚歸各區俾胥能獨立一校必其屯之不立學堂乃舉學欸全數提歸本區庶乎利益均霑而鄉學不至患貧矣然而新築萬間廣廈托庇四境生徒即令百方羅掘財力依然不給故校舍非借用不可查本邑各村均有祠廟中附會房數間擬請飭知各路區學董凡鄉學無堂舍者准其佔用違者以阻撓學務論如此雷厲風行將不費一錢而四境之講堂寢室雲連霧合矣惟城內師範講習所借用儒學衙門學生尙無宿舍擬在後院添修正房五間第一兩等小學借用龍岡

書院堂舍均不敷用擬在後院添正房五間前院添東西廂房各三間總計洋瓦房十六間共估價洋三千二百元擬由原存學款動用若擬新改之第二小學堂借用財神廟班次不多暫不添建至東西北西南擬借各寺院稍加修葺便可開班悉無用大興土木也經費充矣校舍備矣學堂可以林立乎未也科舉初停學堂新設舊人才既不適用新人才又未產出即或多辦學堂亦擲金錢於虛耗壯堂舍之外觀而已於人才之教育固渺乎不相涉也雖本邑在奉傳習者已有十數人本城師範傳習生客冬畢業三十人亦均可作師資惟本邑五百村屯需用教材至夥乃祇有此數十人故公學私塾多係舊派主教即間有傳習生而一傳衆咻亦多爲其同化力所化學務何由進步然取嚴格主意全行撤換則又向何處聘大數教習以應急需華擬降格以求而作通融之政策焉計四鄉私塾約四五百處塾師亦即應有此數擬令來城甄別擇其舊學饒有根柢稍通新學者准充初等教習嚴加淘汰亦須取錄百人其文理清通而缺欠新知識者擬令於暑假期間來城研究約可得五六十人第二班傳習生程度頗優雖肄業一學期未滿一年畢業之

限現爲需人起見擬於暑假之後先行派充教習隨即添招第三級傳習生補足原額至明年春初將第二班生調回補習而以第三班生接充其職如此教學相資輪流更代總計數項約可得教習二百有奇再有不足稍行取材異地庶無乏才之歎矣然此猶其可緩者耳華試言本邑學務之刻不容緩者治國者各安分土則興用兵者各守汛地則勝辦學亦何莫不然本邑興學有年而茫無頭緒良由學區之未畫耳擬遵學憲頒發新章就四鄉區域畫爲東南及東西南北五路每路各畫四區查東與東南二路長約二三百里然山川旁午村落零丁故難多畫西路方六十里廣袤不及二路而地勢平坦居民稠密故亦照畫北路南北不及二十里狹處祇四五里東西雖寬不足四學區之數擬割東西二路鄰城一帶附入該路畫歸一律南路寬六十里長四十里而西河東山之間居民廣集故亦可畫爲等數且各區雖準於地勢之廣狹居民之疎密然究以地捐湊足三千日者爲限凡以便於學欵之支配也第教化之興由近及遠城中如未風靡鄉下何能草偃擬先由城中畫起以鼓樓爲中心點以四街爲經緯線分爲東南東北西南西北四區

庶幾建設學堂有一定之地點矣區域既分非派專員經理事成則功可爭事敗則過可
諉何進行之有查本邑幅員遼闊祇於城中設勸學員二人以之調查四鄉每歲難巡一
周且轉瞬即逝猶如傳舍奚暇勸導無惑乎日言興學而學未大興也現擬每路公舉學
董一員直接監督專司一路之學務各區舉區董一員奉學董指導專司一區之學務城
中勸學所即以勸學爲名乃總董而外會計四人稽查三人勸學祇二人名實既不相符
責任亦不平等擬令一人主會計一人司文牘餘四人除抽查五路學務外各任城內一
區勸學之責且每屆學期無論城鄉辦學人員總以建設之多寡爲成績之殿最擬由總
董釐定等差呈請監督分別獎懲惟每區學校有增加者即爲及格有解散者方爲劣等
總董不得上下其手也至稽查之三人華與韓鍾玘張四維各居其一現在華已派充總
董韓張二君學問淵博早充教職近兼充研究會長礙難再兼他職應將稽查名目刪除
稍節繁複職務既因區域而分學堂即應隨之而設亦擬先由城中試辦查本城祇有傳
習所一處同在東南一區他區就學不便擬將財神廟私立小學改爲官立第二添招學

生以便西北一區之學齡至該區向設官話字母學堂教員久出不歸該校已同虛設擬請停辦而以其款擴充第二小學東北有清真小學但係回民自立款項不足勢難經久擬將該族糧地二捐截留爲該校經費俾可以永久支持惟該校不收外教人外教人亦無肯入該校者該區學生未免向隅擬在藥王廟添設初等小學一處俾有所歸西南無學堂則擬在大塔寺添設若五路各屯則責成區學各董要以教育普及爲目的否則以溺職論此進行之大較也如蒙允准施行當再詳呈細目是否有當理合呈請
監督鑒核飭遵奉草茅下士罔識機宜臨穎怵惶不勝鵠立待命之至

報告奉天教育總會書

前 人

開原教育分會爲報告事啟會於宣統三年三月案准

總會咨開本年通常會中議准各分會組織研究會凡教育之應興應革事宜均許會議公決仍准照辦呈報等因准此相應依法招集會員開會三日賡續研究總計議決事項一十有三試爲總會縷析陳之

一辦學事權宜謀畫一也本城官立學堂共五處均由勸學所經理頃因聯合會開議准男女兩師範歸該所至兩等小學一概附屬董事會舉所中辦學之權剝奪殆盡以致勸學員長辭差而董事會又不能接管不設法維持學堂將瓦解矣查勸學所爲學務總機關載在部章若復准董事會參預將來報表查學在在需人徒增大宗經費而學務且多紛擾若謂該所辦理不善則當設法整頓或即取消必二者兼存則政出多門衝突在所不免矣

一各屯村正宜用士人也本邑村正多兼學董凡教員之去留學生之進退皆能隱爲主持甚或顯予干涉而充斯役者多係土豪地痞目不識丁與教習清濁異流故時生齟齬鄉學之多故半由於此查塾師之被淘汰者因無噉飯地每暗中與學校爲難若用爲村正則飯碗主意既能達到目的而又斯文一脉當與教習水乳交融相助爲理蓋其人識字尙多文義或通凡學堂一切報表等事皆可補助教習之所不及且教習更代之際學生成績之優劣學堂款項之盈絀時多轉轄若以本屯士人充村正則帳目自能經理表

冊自能保存利益良非淺鮮或謂士人柔懦凡催捐籌款等事深恐不勝其任不知催捐各役皆受村正指揮苟用人得當又何慮人民之抗捐耶

一男子師範學校宜加整頓也夫教育之良否在乎教員而教員之良否又在教員養成所之教員蓋任教員者不貴有自己研究學理之技能而貴有教授他人之技能而教員養成所之教員非特貴有教授他人之技能且貴有教授他人有教授之技能本邑立師範養成所數載於茲而收效較少者其中有缺點焉一補習師範班程度太低時間太促此後宜擇學問優長之人勿使僅識之無及雜色人等濫竽其中一鄉學均係單級非諸單級教授不易奏功此後宜添單級教授法以單級師範畢業生任之一實地練習爲師範之特點此後宜設附屬小學完全單級各一班以備練習一師範不熟悉兒童之性質則教育不盡合宜添聘師範畢業曾充小學教習一二年者借資整頓庶師資養成而教育可收良結果矣

一女學高等宜改師範也本邑女學發達而教材缺少僅有女師範一班畢業且在四年

之後需才孔殷河清難俟識者譏焉必添簡易師範一班一二年畢業乃可救燃眉之急查該校高等一班年齡程度不齊教授管理實難得力急宜擴充學舍擇年長學優之女生擢升師範其年幼者留在本級肄業再提升初等學優之女生補足高等班額而初等班則添招女生補之如此則僅添師範一班而三班年齡程度均免參差女學且無乏才之歎矣

一小學校長須有進退教員之權也夫教員不一致則學堂萬難起色而一校之中良莠雜聚新舊交訐非有權以制之則校長欲東而教員欲西無論薰蕕之不同器也即令臭味相同而意見且不免參差教授管理何由統一惟能制其進退則不慮此或曰校長有權保無流弊乎不知校長負全校之責任果有流弊則罪有專歸人非至愚熟肯以援引匪人自速官謗乎所謂請予校長之權者職此故也

一教員宜久任而定賞罰也賞罰明事乃成天下事皆然教育亦何莫不然苟彰瘡不施善惡一是則善不知勸惡不知懲人亦何樂於出力哉雖義務年滿有獎勵省縣視學有

報告是亦爲賞罰之一途竊謂是皆不足資勸勉也何則視學將到各校早有所聞灑掃堂舍嚴訓兒童預備教授即平時極惰之教員亦能支持一二日况視學又不能密察暗訪真僞奚知即令真情已得考語已加幾曾見學憲據報告爲褒貶而本地據以定取舍哉欲行賞罰必須久於其任小學教員以五年爲限無大故不准更動且教學之優劣以學生畢業之程度爲律優者加以異常勞績劣者按成減其薪金則教員焉有不盡力者哉

一教授初等國文宜詳悉字性也夫文者積字而成者也不明字性胡從造句不能造句奚由成文故教初等小學生在辨字性先授實字如名詞代名詞動詞狀詞介詞是然宜先授獨體字以再遇二字合成者有所觸發也次虛字如連詞助詞是小兒理想直捷不利用虛字此時但宜告以大要不必逐字詳求以免徒勞字性既辨可教以積字如牛字之上冠以黃黑下綴以大小是也久之乃教以聯句如主客二名詞間加以動詞爲主人送客則二名詞成句矣聯成一句之後再教以二句三句相聯如一句因二句果或二句

因一句果皆是也此時宜注重連詞助詞以反正開合均在諸虛字之關合也句法至此終乎未也能聯數句成文而不辨雅俗不曉伸縮非文也教習應編成俗話令學生釋爲文話或舉成文之話令學生翻成俗話或造長句而令縮短或造短句而令伸長久而久之自然善文一致斐然成章矣

一高小國文仍以造句爲權輿也夫高小學生多由初等畢業似能造句矣而正不然前於招考學生時見有累牘連編不能成句者矣故仍宜先從句法開始但應取馬氏文通等書擇要而詳說之不必如教初等之淺率也迨文從字順然後教以筆路如起承轉合及抑揚頓挫是也惟講筆路時須取學生講習之文任舉一筆以爲榜樣學生方能得力若憑空結撰議論雖高隔膜不入也至句法筆路略識門徑然後授以謀篇命意諸法學生胸有成竹即在中才亦能獨抒偉論一綫穿成矣不然於識字無多各生語以意到筆隨即令舌敝唇焦終茫然不解爲何故此秉鐸者不可不知也

一教授各科宜知用意所在也夫出門無一定之方針則南轅北轍終無登峯造極之一

日教授各項科學若無一定宗旨將如游騎無歸萬難就我範圍擬自今凡教授學科當體認各科之用意所在且著眼今日之國勢民風講求實益庶學生趨向有定不至誤入歧途矣

一各科互相聯絡以資練習也查部章規定講授之時間多溫習之時間少無惑乎兒童之強半遺忘也其實修身皆經史之要義歷史多地理之事實圖畫亦格致之模型若授修身以歷史爲證授歷史以地理爲憑授格致以圖畫爲副則講授此課即溫習彼課庶足引起兒童之舊觀念而各項科學無不印於腦筋矣說者必諉於部頒課本教習無紛更之權兩科雖一事其如不能同日講授何不知教習苟擔任二門以上皆可自爲聯絡脫有先後則先授此課預爲提示彼課後授此課又爲追溯彼課雖不同時並授而互相印證無害於聯絡也

一小學之兒童以訓練爲管理也蓋訓練者誘掖獎勸引兒童於道德管理者以成法強制兒童俾不犯乎道德也若管理過拘俾兒童拘謹性成有若處子於尙武之教育不大

相悖繆乎故教育原理貴訓練不貴管理恐養成兒童之奴隸性也本邑各校嚴者或施夏楚寬者又一切放任均非正軌也擬令教師詳察生徒所能之事善於勸誘使知有自然結果之關係又當以經驗爲訓練或有不足則當本身作則如欲以信實訓練生徒則凡已之一切言行皆出於誠意生徒不信實之處即詳加訓誡萬勿等閒視之漸染既久則生徒自不作僞勝於撻伐多矣

一同等之學生定期會考也凡事不經比較則美惡之真不出本邑學堂成績優美者固不能無而陋劣不堪者亦所不免非會同考試則優者之巧無所用劣者之拙有所藏學業之退化其又誰尤擬仿照省城觀摩會章程於年暑假之前定期會考以資比較庶因循敷衍者亦知優絀立判而熱心教育矣

一鄉間識字學塾宜於冬季開課也簡易識字爲預備立憲之要務本邑僅城中創設鄉間則置若罔聞豈盡員紳不肯出力抑亦有絕大之阻力爲辦學諸人所不可強迫者也查本邑鄉民多係業農春耕夏耘秋穫實無一刻餘閒責以人塾心有餘而力實不足若

俟三冬農隙之時開塾授課夜間二點鐘或晝間加授二點鐘則一日可授二日之課將農業無荒而教育不難普及矣

以上各項皆就本地情形切實研究而得是否有當理合呈請總會鑒核施行

上開原縣陶公霖甫條陳

邑紳 郭裕齡

爲擬籌經費抽欸歸公懇祈酌核指示事竊以辦理新政需欸甚鉅因噎廢食規避者多生不揣冒昧僅就管見所及因民之利以利民者擬舉三條附單呈閱似能裕欸防奸息訟安民上下交受其益未識曾否有當仰祈酌核可否批示准行抑或詳請督憲以定取舍生非好事伏思食毛踐土具有天良際此多難時代凡屬國民有一分心力即宜盡一分心力况生家被恩五世尤當盡言無隱即所擬各條掛漏實多仍懇剪裁以資補助所謂善政得民財者此也再能上下一心和衷共濟富強之望易如反掌矣除將籌辦新政各緣由具稟上陳外另繕清摺附後此稟 父台案下恩准指示施行

光緒三十一年十一月呈

一曰墾閒荒所以化私歸公也請將屬界村屯無主閒荒無論已經被人私墾或尙未經

開墾凡查無文契可憑者在某村界內即准某村公會計畝報領照章納賦免徵荒價庶上裕國課下阜民財非特有欸可辦新政即私霸互爭之訟亦可以弭

一曰設保貸所以益富濟貧也請立保貸局代商民出貸生息或商民自貸宜將借券送局蓋戳該局即照借券註冊存查另發執照至期交局該局在所得利內抽收百分之五以三分歸公以二分作該局公費能設局者設局不便設者即由公會代辦尤爲簡易若然則貧者得借資本以謀生活富者不憂誘騙可多獲利則昧債抗債賴債拖債之訟可以弭

一曰查典契所以防假混真也請示商民嗣後典當房地文契旗歸旗署民歸民署蓋用紅戳照契摘要編號註冊以備查核至回贖時兩主同到報銷即照契載價內抽收百分之五此五分勻作二期接典主於置時交二分五釐出典主於回贖時交二分五釐如此辦理則假契匿契二契丟契之訟可以弭

以上三條均須有四註清冊按月呈報該管上司以便查核至於擇人防弊任能獎功各

該經理人等務必認真期收實效然尤有急於此者目前可憂之事日兵雖退各村屯盜賊蠶起綁票捐烤苦不堪言雖令各處遵辦巡警一苦於無人一苦於無械時危勢迫進退維艱更兼城中兵力單微勢難兼顧欲除此患非有勁旅不可若猶視為緩圖竊恐釀成大患遇有盜賊不易撲滅實於當下地方情形似多不便惟望愛民如子除暴即以安良閭邑商民幸甚

正堂陶批墾務事宜有墾務大臣專辦不必再議保貸紅典二條均屬便民預杜訟端然倡率非易存俟酌核弭盜一節係為當務之急現已飭令各練長置備快鎗竭力整頓此批

請籌青糧補助巡警議案

歲貢生 王毓琪

竊開邑自劃分五路以來巡警學堂紛紛辦起賴我憲台提倡之力亦既新政施行矣然上下有偏枯之弊公私無聯絡之方猶可慮也夫各鄉村正即各鄉辦事之要人從前操辦會事看守禾田年終時統計村中費用按地均攤名曰青糧今警學成立各村農家

既每日地每月擔負地捐洋一角是每年農戶所攤已變爲警學經費再多攤派勢難承認因之各村村正有奔走終年無處籌款受其虧累者有把持會事別生枝節任意苛派者推其致弊之源皆以無一定酬報使之然耳乃一觀官府之責成村正也學務未辦曰惟村正是問警捐未齊曰村正是問責任如斯而不籌以相當之利益一任懦弱者枵腹充公欲辭不得貪橫者藉端滋擾自飽私囊何權利義務之不均也尤足患者巡警業有局所各鄉農戶皆恃防賊有人不復存自爲防守之計偶值凶荒不靖雖有再倡團練者農民憚於費錢亦將以警局已立爲藉辭而不肯首先操辦在警局則勢難兼顧斷不能以數十人之衆舉所轄村落盡保其無虞此非有巡警之弊乃專恃巡警之弊也擬請於警學畝捐以外每日地每月抽紅糧七合一一年共抽紅糧八升四合而令各鄉村正照收糧多寡酌用人數即以此糧爲酬勞費無事則巡行田畝有事則防護村屯蓋即古時寓兵於農之意亦即今日補助巡警之法也惟此項青糧而外村正不準再多攤派如有臨時需用儘可隨用隨攤多取者有罰如此施行庶上下可免偏枯而公私自能聯絡矣

光緒三十三年六月上

籌辦西路模範小學堂案

前 人

竊自西路創辦學務經本邑士紳舉紳爲西路學董自慚識淺學疏難肩重任然事關義務亦不敢不効馳驅援於七月十六日偕同各區區董到處勸導使之設立學堂乃各鄉之未立學堂者皆以未諳學務無所取法爲辭即其已立學堂之處教授管理亦皆未能合法因思地居邊塞民智未開見聞僻陋無怪其然而欲於不易勸辦之中設一廣爲勸辦之法則非爲各鄉立一模範既無以動觀感尤無以率從蓋欲合多數之心思材力使進於文明必先定一方之規矩準繩首爲之表率也遂與各區董等公議在西路適中之地慶雲堡立模範學堂一所招高初等學生二班每班四十人擬聘北洋簡易師範最優等畢業生劉義陳仲篋暨奉天警務畢業生劉濟爲教習其經費由西路各鄉學堂教員年暑假薪水勸作義務就西路村落計之約能立學堂四十餘處每年可得款一千六百餘元樽節設施尙能敷用已函商西路各教員無不贊成此舉至開辦費一項紳願自爲

擔任人民不另增擔負而集腋自可成裘學校雖粗具規模而造車咸知合轍一事而兩有裨益莫此爲便除所需經費詳細繕單呈閱外理合將籌辦西路模範學堂大概情形另文呈請 監督案下核示施行

光緒三十二年十一月上

提議整頓鄰近南滿鐵路國民學校案

一理由

邑紳 羅寶書

查教育一端原爲造就國民之要具故世界各國凡欲鞏固其國基者莫不以國民教育爲前提誠以本國人民受本國之教育始能知本國之關係爲完全之國民而造成健全之國家理有固然無或易者近查滿鐵會社於沿路附屬地內莫不設有該國之學校於中日兒童兼收並教揆之大同主義該國之設施似亦未可厚非殊不知一國之教育要必視本國之國情爲教民之目的非他國所可代庖而不可使他國有所干預也茲以一介兒童知識未開尙無國家之觀念入學初步即入他國之範圍斯語言文字道德習尙

皆以他國爲模範而與本國相隔絕迨至成年而後直不啻一完全之他國人矣倘非及早設法維持勢必日人之學校逐漸擴充我國之幼童漸多收入彼日人以精神之同化暗據我無形領土一朝禍發挽救何及本員有鑒於此擬將我國鄰近附屬地之國民學校力加整頓俾我國幼童不再入日人之學校則國家前途庶其有考

二辦法

甲 實行強迫

義務教育久頒部令惟以碍於事實奉行者尙屬寥寥宜通令各校凡鄰近附屬地之學齡兒童有不入學校及甘入日人學校者均實行罪及其父兄並迫令該兒童務必入本國鄰近附屬地之學校

乙 優加獎勵

家世寒微恒爲就學之障礙實物獎勵每能鼓舞其歡心宜通令各縣凡鄰近附屬地之國民學校於就學兒童一律免除學費並由各該縣勸學所發給的款令各該

校按照學童試驗等級每次分別給獎以資誘導

丙 模範教科

地屬雜居日語頓爲需要直觀教授實物最增興味教育部令原有酌量地方情形於高等小學添授日語之規定國民學校雖非高等然地域既屬特別則部令亦可呈請變通至如標本儀器凡附屬地內日人學校所有者我國鄰近該處之學校更多未曾設備比較參觀頓分優劣愚民甘願入日本學校者亦勢也宜通令各縣凡我國該處之國民學校均應呈請咨部變通部令一律添授日語並於標本等項完全購置庶不致以教科不完之故爲就學者所藉口

以上所陳爲本員管見所及謹按省議會暫行法第二十五條提出議案是否有當尙祈公決

序記碑銘頌

敕諭以昭仁澤之敷施疏議以著謀猷之入告載之鄉史俾我開民衆至沒世而不忘

意良厚矣然歷朝之建築名士之遺文以及立論著說寫意抒情者罔不有碑碣可徵
篇章可誦亦本編樂於採輯者也惟蒐羅雖取其寬而選擇不容或濫故必有關於世
道人心民風正義者始收錄焉若荒唐之神話迷信之蕪辭本編皆不登載諒能邀閱
者之曲恕也

明

開原重修儒學記

陳 暹

國朝宏敷文教不式四海雖窮荒僻壤罔不立學宮祀先聖者崇本業也開原城有廟學
爲日久矣圯于水潦兵荒之餘不墜者如綫兵備憲僉滁陽王君履任三日謁廟登學課
諸生見其然也瞿然嘆曰弊也久矣是豈宜然哉夫中國之所以賢于夷狄者以禮義也
禮義之教始于堯舜傳于禹湯文武周公而大明于孔子萬代宗之是故廟以祀聖崇其
報也學以育才敷其教也皆以爲禮義也禮興則遠邇化而治道成矣開原介在毛憐女
直福餘諸夷之間顧吾之所以能綏之無敢犯順者亦惟束之以禮義範之以文教故也

今茲廟學乃禮義之區而反簡略不治若茲其何以肅觀瞻而起效法也哉中國禮義苟修猶慮未足以怙四夷而況棄之乎茲工也其不可已也已乃檄衛司度工命日慮材用鳩工徒具餼糧備器用渠渠然有事矣亦閱月而奏功階序牖闥秩如也墀城除鞏如也彤鬢赭腹炳如也諸木蒼鬱森如也講授者寧居遊談者快觀春射秋饗貴齒尊師濟濟如也雍雍如也事竣屬暹記之暹惟學校之興也非見有卓然而深識治體者不能也何以言之夫治外者先治內正末者先自本是故折衝禦侮之君子不致意於壘壁之外而常用情於樽俎之間此舞干格苗由壘降崇古先帝王之所以成治功也使中國禮義修明彼夷狄豈能無動乎彼見吾夫子宮墻之美百官之富也則將起肅敬之心矣彼見吾學士先生濟濟彬彬然動合規矩言由禮義也則將生效法之心矣彼見吾俎豆之盛干羽之麗也則將消其強暴之態革其射獵之習矣昔漢宣帝時文教若彼突厥尙慕之遣子入學况我聖天子治化之深文物之盛而又有諸公敷宣于下安知毛憐女直扶餘諸狄中無若人哉然則是舉也崇內教以規夷狄固不重乎哉

開原兵備道題名記

兵備
黃雲

開原古肅慎氏地代多爲胡虜窟穴我朝開拓疆宇迺得撫而有焉時置叅戎以分鎮之逮嘉靖癸卯上用言者議俾予始自金州移至于茲至則邊備久弛倣報日聞人咸危之予訊其故雖稱地方孤懸夷情叵測然皆歲時納款通貢不絕如綫非如西北黠虜之號呼可以億萬集爲我秦燕晉諸邊慮者無奈司土者類每疎庸制馭寡術且從而邀功於撲誘欺愚於馬市構怨召禍弗可禁詰予深用爲懼即深告所司不敢易犯既而從役邊功以漸告竣再踰年我備謹嚴而彼之納款通貢者如故也予緣以爲記且如例題名焉或曰古人事業掀揭聲流後世何需於此予曰古人之莫可尙已然或由此使人見而興仰止之思者不爲無少裨若其漫無可否甚而遺臭焉斯其下矣予固懼夫下者也後之君子其尙友古人無猶夫予之徒懼云爾

重修六衛預備總倉記

巡按
張鐸

六衛預備總倉傾圯頽廢有年矣倉之儲院寺道司咸積焉其出納有紀然歲久多朽貫

乾沒或旋旋焉暫寔其藏而工費百出蠶食蟻遷無留儲矣余始至周覽因語人曰是地也危乎東堡險遠北至開原南抵前屯渠醜竊伏而韎韐腥羶習與爲鄰烽候方馳即薄陴下堅壁坐困以需應援兵家恒變也而邊儲其容緩乎况歲飢則糴閉轉輸頗艱稔則值輕而妄費不計土人故習往往如此宣德間北虜寇廣寧縋城欲上內卒乏食且恣恣謀潰時王忠肅公大括民粟給之事乃定夏四月余憂之因閱左倉飾其故址以廣儲也垣墉令堅土茨令厚橐之板以固其封穴之地以注其濕從右闢門有隙地延袤數百步中葺舊廳會計者居之左右各十五厰貯穀近六萬斛穀皆歲餘抵贖自余蒞事之後者記之前此不錄也工食若干頗無劇費區之曰六衛預備總倉或曰倉一也而名不同何哉余曰預備舊著其名而時爲出入維茲約而藏之嚴關秘鑰而不數數然啓待其荒也而散之伺其豐也而歛之補諸軍儲徵之屯種媁媁然樂于有濟而匍匐赴之矣古有義倉者殆謂是歟宋史載安石欲行此法而贏縮其息夫爲人上者將以惠民而什伯是利陋也甚矣後之按此同志者罪有罰律有贖穀將秩秩其多分貯各倉以資百用而是倉

也禁而不費其斯土之幸乎因爲文記之

增建河東七堡記

前兵部
尙書 范 鏞

遼東之鎮東西北三面距夷每爲諸酋窺伺剽虜殺掠迄無寧歲若廣寧與遼陽之西北直抵開原諸邊多在原隄垣塹墩堡殊密適均守望追襲計程可及顧惟遼陽迤東臨邊一帶萬山叢疊修林森翳牆弗克施入難爲守而地之相去南北不啻七八百里其間止設六堡兵馬亦僅三千應援則艱於地遠捍禦則苦於兵微駸致虜勢猖獗頻年失事比于西北殆又甚揆惟厥先拓邊置堡一時草創夷人住牧尙遠中國地利未通勢未及備故自馬根單堡而東爲青沙堡又南爲鹹場堡爲髮陽堡皆相距七十餘里而其間乾河王老諸嶺險隘艱阻策應靡及又東南爲湯站堡虜從石岔口循短錯江入掠江沿台屯衆其離湯站八九十里應兵未至賊已飽獲而出失是五要無怪其出沒無常而荼毒疆場也雖每歲發兵禦防糜財動衆顧左失右非長策也曷若酌地形察通塞憑隘衝控險阨準道里切應合分地置兵據要制變此五堡之不可以已也開原當胡虜之衝邇來修

復邊牆鐵嶺臨邊遼河之外人業其地創爲鎮西堡以衛之但孤懸絕塞而諸城堡遠隔遼河應援越涉危亦甚矣汎河邊境有所謂李千戶屯者阻山爲險聚落頗繁雖虜寇迂於內侵而羣情樂於自守曷若立此應增堡障此又二堡之不可以已也然而莫之及圖也嘉靖丙午巡臺御史南畿張秋渠先生鐸按治茲鎮守重大防拊疆域之勢慎積僂之慘詰夷夏之限求得失之端繹控制之略積謀發慮奮然軍圖本之以忠勤出之以經濟廣之以周咨任之以勇決是故蒞開原俯遼河閱鎮西見羣胡環向一堡孤危於是有彭家灣堡之圖焉又踰汎河察民隱因地順志於是有李屯堡之圖焉爰及多虞覃極諸要騷陽東路數百里二三十年之患必欲挽危就安首舉尾應乃先之以備禦武勳之相度以發端繼之以守備韓承慶之規畫以起事先生曰定邊息氛國家之福也出籌捍患憲臣之分也吾何責之辭又曰閱歷劑量非躬視弗周吾將往省焉迺率諸司循邊出塞穿林策嶺自馬根單歷清河而知虜從明牆而入也于是有散羊峪堡之圖焉自清河歷鹹場而知虜從鴉鶻關諸路而入也于是有一堵牆堡之圖焉自鹹場歷洒馬吉新安等處

而知虜從北古河臺諸路而入也于是有孤山堡之圖焉又出雙嶺歷險山而知虜自石岔口經索果直而來也于是有險山堡之圖焉又自險山歷江沿臺而知虜從打探峪入瓦子峪而來也于是有江沿台堡之圖焉相宜度形舉要扼會左右適當聲勢聯絡緩急便宜戰守俱利無俟牆壁之防永得控制之策內有耕牧之利外無衝突之擾是故二堡立則開原寔矣五堡立則薺陽固矣七堡增則河東自此可以無虞矣安邊保民莫此爲大于時撫台都憲岷郡於疊川先生敖協心同德經畫審處相與檄議諸司苑馬寺卿吳君惺行太僕寺少卿朱君屏分守參榮君愷分巡憲胡君諸兵備憲黃君雲分守遼陽副總戎种君繼掌印都司劉君通罔不敬應其議既乃會疏上請恭荷諭旨命舉及時遂於歲之七月經始分理鳩工集事秋渠先生經紀百務督率備至財用資糧皆出其所籌積而遊擊將軍王言都司僉書許策楊棟繼至專心共濟暨諸司百執事烝烝趨效起于九月秩然報成其城塹之高深門營之嚴整軍容之壯飭墩台之森布雄視邊陲鎮警諸虜久矣常山之勢不拔之圖萬民之利百世之業也既卒事諸君謂不可無記愚以爲修障

塞補隙漏及時圖事保大定功秋渠先生爲國爲民之盛舉也莫爲于後雖盛弗傳而今而後時葺屢省恤兵容衆又吾將兵者之責二三守臣所當自効也天時不如地利地利不如人和請以是終其記焉

教民恒言序

康熙十七年

奉天學政姜希轍

六諭恒言真菴魏相國所輯以牖民於善者也鄉社行之久矣今年春予奉簡書視奉天府學政甫下車開原劉令來謁謀以是書頒布講約俾山陬海澨咸識爲善之樂誠良有司意也凡民之生清濁異氣剛柔殊質淳漓異習而降衷惟一道之斯行聖人因人而施教樹鄉國之學以至黨有塾鄉有序猶恐其不能家諭而戶曉也使適人以木鐸徇於路從而提撕警覺之盛世所以無廢民而成善俗也今遼左舊都西扼紫關東連青海山川葱鬱靈秀所鍾宜其風俗首善而予軺星所過土滿人稀形鳩鵠而噉鴻雁絃歌之聲闕如也蓋此地自句麗以來累代用武迺者遷民新集習聞慄悍之遺未嫻文教賈生云移風易俗類非俗吏之所能爲昔者文翁守蜀而禮樂興韓子刺潮而頑梗化雖蠶叢唇海

之間可以漸摩造就矧遼河東西方數千里舊時戍壘已屬由廬亟宜是書宣揚而勸導誠未可旦夕相強也同官莫不嘉劉令之舉加意撫循廣敷訓迪不特斯民還醇將禮樂之興在此日矣

開原語徵自叙

邑紳馬宗薌

昔在揚生慨輜軒之使絕采覽先代絕言殊語爲十五卷書其甄解已多矣吾師餘杭章君爲新方言十一篇於殊言絕代之語存於今者明以六例經以音變諸州國殊異之言詰詘之語比輯診發開示模略夫而後聲音之奧訓詁之原百物之正名羣言之達詁則居可知矣所謂理羣類解謬誤曉學者達神指將於是乎在窮神知化德之盛也顧維茲書之作方當息肩於夷禹域之大州邑之僻未盡甄也遼左一隅昔屬建州開原之域地當柳塞而委巷之談婦孺之語由舊不失與古訴合以知漢族僻在夷貊而言語固無殊於姬漢詞氣曾無異於中原雖千載之遠諸夏之微而十口之傳三人之師遠陌不越觸理如命率詞揆方既有典常曾不以遠而有所異則知販豎之語不容僞弁雅故之書未

可尊閣也俗儒鄙夫不通字例則謂民言無嘉言文賤遠欲廢方言代以官話怪舊執而善野言用已私而騰巧說以言名理則僻違而無類以達民情則支離而不析是非無正謬誤不反幽谷之久即禽可虞如其制復保氏人習小學則出話皆然聖文不墜出之於口爲如心之志筆之於書爲嘉令之文言文一致之真古人垂訓之美尙其並善弗致迷悖策勳效績則在此不在彼也今即開原方言證以故書雅記稽謨所聞紹承師緒庶幾僻遠之詞爰明以諭文字之用信而有徵也易繫辭傳曰開而當名辨物正言斷辭則備矣高山仰止景行行止雖不能至心嚮往之若其篇目義例一遵章君新方言之所揭

爾雅草名今釋自叙

前人

清儒錢坫通釋爾雅地丘山水四篇以今地證古地以今音證古音明徵定保審諦如帝正名之懿於是乎存吾師儀徵劉君繼作爾雅物名今釋編纂未成先成釋蟲一篇謂萬物形狀命名之義均可於聲音訓故求之發例十二以釋諸蟲推迹故言獨恢昭曠歟然若析符之復合的然若兩矩之可絜可謂究洞聖人之微愷以俟百世而不惑者也嘗謂

諸例可通萬物謹遵斯旨以續未竟成草名今釋一篇先溯得名之原繼以今名證古本之故籍參之目諗於所不知則從蓋闕經始於共和七年一月成藁於十年三月劉君已於八年九月亡矣不及奉質彌用悵悼續輔嗣之書載慚康伯尙夫子之高更愧有若故記其原始以爲引端云爾

修城記

知縣

明

亮

易曰王公設險以守其國險之時用大矣哉詩云王命仲山甫城彼東方是城之不可不修也明矣故溥彼韓城興實墉實壑之歌而有以俶其城美申伯召伯之作倘恃陋而不備罪之大者也逸詩曰雖有絲麻無棄管蒯雖有姬姜無棄憔悴言備之不可以已也是城之修不以太平而或廢也况奉天爲發祥之地不可不壯觀瞻開原乃邊塞之區不可不嚴保障余自四十一年到任扶餘翌日閱城出其闔闔惟土阜而已環其雉堞惟棘牆而已居然培塿何須懸布而登密邇封疆自可鳴鞭而至夫乃嘆大道之行外戶而不閉大道既隱城郭溝池以爲固此禮運所言茲於殘缺之金湯而愈以昭邽隆之景象矣迨

四十三年翠華東巡特命修理四十七年告竣遂乃佗佗言言如周禮所謂司門掌管
鍵以啓閉國門譏出入者殆相類焉况登城而望外則營屯櫛比內則廨署碁布不愈增
其雄偉矣乎故爲記以誌之

修倉記

前人

夫倉者穀藏也存救之要術儲蓄以虞災也月令曰孟冬之月命有司穿竇窖修困廩謹
蓋藏務積聚乃重粟之意也詩曰我倉旣盈我庾維億美額貯之豐非待凶而頒者與自
古以來有均輸有常平有義倉有社倉法制不同而總爲民計然厥口之不堅收貯之不
謹則利於民者有時而害於官矣即如前令以交代期迫誤用算丈之法致短米石獲咎
侵欺又查出倉廩破敗霉爛米穀豆麥至三千有奇加罪追賠修理致令瘦死獄中又有
一令亦因倉糧霉變被參革職審追嗣後交代因倉糧拖欠不知凡幾矣自余到任後視
其廩間則風雨不蔽也驗其穀粟則糜爛難堪也詳報修倉而未蒙批示日夜焦思以爲
陸曹之續矣幸四十二年御史索諱興阿公按臨開邑詣倉大怒即欲提參因查詳稿未

見回批乃宥余而參上憲奉旨改修倉廩減其額貯而十二城亦賴此而詳修是百餘年之積累一旦而清除矣余憫二公之受辜又歎一身之幸免茲於修倉告竣後而作記以爲炯戒後之君子幸留意於倉務焉可

養蜂者說

前 人

余因公赴東山見養蜂之家擇山陽空心老樹鋸而存其半封其頂而空其腹以爲養蜂窟者不下二三十株有蜂老丈焉昂背躄肩高步闊視似有道之人也居而問之答曰蜂雖微物性實靈也王者不出有君臣之禮焉螫者無赦有刑罰之義焉一日兩出而聚鳴號爲排衙有威儀之制焉採無所得而經宿不敢歸房有服役之忠焉至於分巢必合黃道能協天時月令之宜而釀蜜獨具巧思大爲和藥調餵之助蔗飴雖美不及卉醴之功多也力田有秋未若隱豬之利普也且享其利而留其餘厚其儲而孳其族是我爲仁字而蜂獲樂郊吾一家數世之衣食皆賴於此又豈沾沾焉誇十七桶於洪武之前乎語若穿珠雋如炙輠旁有老役執梃首肯者久之余亦正襟危坐命吏折簡而書之

廟碑

清

新築文廟碑記

知縣 劉超 凡

自精一相傳以來木鐸一振道隆千古奚待創建殿宇然後知尊聖人耶然而天子辟雍諸侯泮宮當視學之日大昕鼓徵天子猶皮弁釋菜經筵講官儼然以

先師臨之庶幾在學子弟入其廟聆其義如覩其人借曰夫子已往吾不信也開邑設於康熙三年首任何令尙率百姓廬幕於茲他未遑圖乃孜孜焉以文廟爲首務僅於縣治東南隅置草殿三楹不止明堂兩廡泮池未備即所謂宮牆數仞者尙未暇謀及也斯時也制科初設青衿乏員何令僅於朔望謁茲草堂至春秋丁日伐鐘鼓獻帛爵皆如禮焉誠謂五方雜處剛柔緩急非禮樂無以齊之故欲民之歸於和厚也斷自學校始今余歷任二年餘躬率文武生員及夫社學子弟築垣爲藩立櫺星門及左右二坊餘地東西計十四丈南北計三十丈務使足以爲明堂兩廡地者以俟異日縣令培育

人材興隆學校則譽髦斯士孰不望宮牆而興起上以咏王國之菁莪下以厚邊隅之風教豈獨增輝俎豆僅鳴辟雍之鐘鼓也哉是爲記

重修文廟碑記

康熙二十二年

知縣周志煥

歷觀世之盛也比戶弦歌崇儒明道必自學校始鄉學三代異名國學遞仍其號鄉學即今之郡學也講道明倫接洙泗之淵源續斯文於不墜養老而教射尙德而毓才無不出於斯焉典最盛矣值聖天子稽古右文躬親釋奠經筵講學博徵碩儒聖賢之道昭明於世誠唐虞三代之時也近又奉俞旨敕滇黔諸省各官創設學宮使山陬蠻瘴之區得沾聲教矧畿輔近地鑾輿臨幸若開原者而文廟茅茨不翦土階湫隘豈所以尊崇先聖之意乎但斯邑建立未久前任何公公金序披荆剪棘泐茅殿三楹奉祀聖賢繼任劉公超凡復立櫺星門外置左右二坊規模已備兩廡神牌俱未之設煥司牧是邦踰越二載心懷修葺力不能建今敬捐貲購工以瓦易茅飾聖殿而重新之置四配十哲兩廡先聖先儒神位蓋欲爲荒邑尙斯文之統以觀揚我皇上文治之盛即瞻仰

宮牆者或亦有所感發焉

重修關帝廟碑記

康熙四十四年

知縣

羅 鎰

粵稽遼志開原於古爲肅慎地於元爲開元路大明洪武始設城池其西南隅則崇壽禪寺浮屠屹然剏建自唐其東北隅有元帝廟建於前明之時惟關帝廟自國朝定鼎以關東爲發祥重地畫郡邑置官守而後有之也余以丙子歲來蒞茲土每朔望至斯見其地勢閎廠規模頗具而頽垣斷瓦風雨剝落未嘗不欲更新之奈地瘠民稀力短心長遷延及今同邑文武僚屬下逮鄉耆之好義者莫不捐俸解囊鳩工庀材奔走共勦建正殿三楹左右兩廡前軒中門角門繚以周垣聖像供器一一丹堊輝煌金碧璀璨凡向時之未有者增而擴之已有者修而整之他如鐘鼓戲樓山門斯以次第畢工而廟貌一時煥赫焉於是民人環謂爲記余不能文竊思

關聖夫子忠義塞乎天地貫乎古今即山陬海澨凡有血氣莫不景仰開原地處邊陲猶能知所崇奉如此非神之靈爽實有以保障之奚以至斯哉然而風俗之敦龐人心之

慕義亦概可見矣是烏可無以記之歟廟始於康熙辛亥歲基址長二十九丈闊三十一丈僧人現真現性共奉香火願僅數椽爾暨丁卯而廟制增美猶未備也茲則百事具舉煥然聿新爰泐貞珉俾垂不朽云

義塚碑記

宦 玉

嘗思人莫苦於離鄉莫苦於離鄉而死尤莫苦於離鄉而死而并無地以爲葬身之所即如開原地廣人稀招聚之民來自異方者甚多年力精壯者尙可自食其力不至凍餒動念桑梓亦可旋歸故里若夫年老衰弱俯仰無資困苦饑寒奄奄待斃一旦不測棺木將安所出即有樂善好施者憐而殮之或浮寄郭外或散置荒郊日久年湮枯骨暴露過者見之情何以堪茲者陽和門外有道人姓郭名珏字無玷號淨明埜人建歸宿草菴同宦玉會齊魯人治地二十五畝十五畝爲義塚即在庵後餘者作庵中香火之資誠敬慈祥垂示久遠承事者果能兢業不違善爲繼述使落魄安然於地下遊魂逝矣於西方與初立義塚大慈大悲欲度人如恒河沙數者又何分先後焉爰勒石以勸將來是爲之記

官設義塚碑記

訓導 劉

喆

時乾隆四十二年歲次丁酉五月乙丑朔二日丙寅恭逢聖母孝聖憲皇后升祔欽頒恩旨內載一窮民無力塋葬無人收瘞者地方官擇地多設義塚掩埋毋使拋露欽此欽遵通議大夫開原城守尉六公十七文林郎知奉天開原縣事明公亮恭承帝命率同僚屬會集旗民選擇高阜二處名曰義塚一坐落東門外農神廟北一座落西門外鬼王廟前計地十八畝委令正藍旗防禦官元保典史雷從雲董率其事於十月既望義塚落成旗民感戴請予爲記以垂不朽記曰昔聖有澤及枯骨之恩國風有哀此瘞獨之誦陳寵埋暴骨廣漢藉以垂休曹褒葬停棺射聲於以流渥故釋氏有言與其滿地鋪金不若祇園撿骨也於是擇阜成塚計開十八畝之邱壠斲木爲棺約收百餘具之骸骨鳩工三月蒨立雙塋既卜地於西郊復鑿窆於東甸築牆禁遊牧栽木斂孤魂洵美事也於戲聖孝格天鴻慈濟世舉斯加彼實乃遍寰宇而及黃泉錫類推仁不啻起死人而肉白骨游魂得所可免風雨之飄搖旅櫬即安何慮荊棘之荒蔓此屬千秋之義舉更順一邑之輿情恐

日久而湮埋故鐫碑以爲記

重修慶雲橋碑記

邑紳進士 王 廷 才

事有可爲則爲之非爲名也顧創作於前尤貴繼成於後隨時與地俾得有所考證而興舉之則叙次其年月表彰其事實亦有不可闕略者如邑之西郭慶雲門外池水環衛其平時騎而行者波及馬腹輿而過者渡若扁舟遇旱乾則坎陷沮洳既有濡足之患遇淋潦則洪濤巨浪更有滅頂之凶且附近城闕爲閤邑出入之總徑來往之通衢日夜奔集絡繹不絕無徒扛輿梁以濟之未有不病涉者都人士因捐貲建橋於其上名曰慶雲橋厥後有廢必興屢經修葺所以表矢直便行旅者蓋已歷有年所矣溯自道光元年居人捐募重修載在碑誌距今三十餘年橋座復見傾圮欲有重修之舉第工程較鉅非密邇居民所能任余因謀諸舖商皆踴躍樂從一切鳩工庀材皆舖商諸公始終其事並遠近官商士庶樂善與同各捐已貲以勸盛舉橋座舊用甄木今則易以條石庶堅固寬平可期永久是役也不請公幣不留私累數越月而工遂竣徒步者無褰裳之苦輿馬者無覆

轍之虞且於是年秋適逢大水西門外人民廬舍多被湮沒僅餘墩阜而居者數十家所有避水男女皆賴此橋普渡得免沉溺則斯橋之成爲功豈淺鮮哉伏願後之人存利人濟物之思體善作善成之義後之繼成於今亦猶今之繼成於昔俾斯橋有基而勿壞是所深望也夫

重修節孝祠碑記

邑紳楊光鑑

原夫節孝祠之立於斯也始於明經王芝亭前輩至如何卜地如何創修載之前碑詳矣然其因陋就簡經時既久遂至剝落不堪春秋致祭無谷樽俎之地者蓋有年矣祠之所入僅以補苴罅漏董事者復袖手不前幾幾乎一敗塗地無有過而問者也鑑覩此殘缺雖有重修之志而綿力無多恐不克荷此鉅任急商之孝廉聯公陞茂才楊公景和重九職任公德成咸以爲然此數人者皆節孝後裔義不容辭者也合辭呈請縣尊祥公蒙批准如所請而重修之志定矣擬以正祠五楹取其恢廓有客也中截花坦一條取其內外有別也陪房五間中爲祠門儲其賃直以備歲修也甘井一泓別闢一隅便於汲綆並嚴

出入也至地基長展數尺牌位統歸一律又稟請在案遵式而爲之者也昔也禮制微具今也規模整齊嗚呼完矣雖然一木焉能支厦集腋乃可成裘始而重九職劉公繼賢倡捐金二百繼而耆民杜公立林亦捐金一百其次陸續助資五百餘金胥附貢生裴公殿芳與吾諸人始終勸之者也夫事特患不爲耳苟有其志事可竟成當夫祠之未重修也既無可籌之欸又無可勸之工局中作局外之觀古今同慨吾諸人謀有同心事無掣肘堵築於艱難之會興作於炎涼之時自始事至告成四閱月而工畢噫何其速也或者節孝有神默爲感通乎抑亦工歸實用衆志成城乎書之於石以爲後之繼修者鑒

重修奎星樓碑記

邑紳趙 鄉 生

考太史公天官書北斗七星第一星至第四星爲魁第五星至第七星爲杓合而爲斗是魁乃附乎北斗者也又云杓携龍角魁枕參首魁斗戴匡六星曰文昌宮然則今之所謂魁星者其即此歟惟設樓塑像之供經史無載大要以其地近文星光分天府云耳况我朝法天立極景運獨隆仰觀俯察創制俱有精意胥郡縣而立學宮莫不設魁樓於東南

城隅向占巽地位列丙方取木火文明之義實學校風水所關士之掇科名拾青紫者咸於斯卜休徵焉是樓之設又烏可忽諸查開原縣志魁星樓建於康熙年間惜當時碑碣無存未能詳其始末迨乾隆四十七年重修之役實賴蒞斯土者明公諱亮以名孝廉作宰斯邑有心文教起而新之嗣嘉慶四年秉鐸者胡公又加修葺兩次均有碑碣可稽然去今已將百年矣其間之歷經修補概難詳述陡於光緒十二年冬夜遭回祿樓像焚如匾額俱燬摧殘者三易寒暑同人屢欲興修絀於經費延及十五年春二月實任開原縣知事詳公惻然憫之首捐廉俸糾集邑神廣爲勸募自五月初四日經始至八月初四日告成經營三月之久花費一萬有奇此次樓形仿他城六抹亭式視舊稍爲改觀倘由此人文鵠起科第蟬聯不誠於斯樓有輝耀哉是役也督理監修者張斗南一肩任之總辦捐項者趙品卿封君裴香閣先生高紫垣歲貢及優附生高秋浦李華春與國學韓百昌也余亦奔走從事得附諸君子之後有餘欣焉樓成屬余爲文余辭不獲爰考崖略勒諸貞珉以冀夫有志興起者是爲記

開原縣關岳廟碑記

短事章 啓 槐

慨自萬方多難聞鞞鼓以增思千載云遙緬英雄而起敬世道日微抱忠義者幾輩時艱孔亟能匡濟者何人夢寐以求馨香而祝歎逝者之不作望豪傑之再生是宜右武並表崇忠敬維

關壯穆候

岳忠武王河獄英靈乾坤正氣忠誠激於金石武烈炳於旗常英風亮節同耀寰區大義孤忠咸深遺愛洵爲師干之圭臬足示民族之楷模

候則翌贊昭烈鎮守荊州心存劉漢志在春秋圍解白馬已佩用兵之神會責烏林復見仗義之正威震華夏聲奪孫曹絕倫羣馬孟起詎能望其項背風流文雅張桓候更難擬其襟懷後之過遺壘者歎爲奇才讀蜀史者稱曰義士

王則智勇冠軍忠貞蓋世兵略天授義憤之歸特其處境尤難遂致殊勳未竟內爲羣小所讒外有強寇之偪誓掃胡氛渡河之聲尙壯難清君側報國之志莫酌恨北戍之未滅

嗟南渡而偏安奸黨快心孤臣泣血願既違乎痛飲事遂至於捐軀十二金牌斷送河山
一統三字冤獄長使今古同哀追述前徽咸懷明德論勳業則山川並壽同期恢復中原
論行誼則忠孝兼全不僅頡頏國士大節相符有功必祀民國肇造特定合祀之章奕世
有靈允爲萬家之佛啓槐黍守斯邦恭逢盛典用特率同警察所長全璞修建廟宇供奉
神靈聚異代之精忠一堂共處增上京之盛事萬古咸瞻是其忠能報國所以德必有鄰
際春秋而致祭志事久欽肅俎豆以明禋心源如接願巖疆之坐鎮廟貌長留伊精爽之
式憑民生託庇從此旌旗顯赫御雲車風馬以偕來袍澤仰觀激古誼忠肝而興起丹修
青飾永期廟宇不刊山高水長亦等祠堂爲記

開原縣義勇祠記

前 人

開原巖邑也外蒙部落控其北南滿鐵道枕其南復與吉林疆土毘連地處極邊爲遼瀋
北門之管形勢既極險要交通復稱便利而萑苻遂較他縣爲獨多以其利於出沒逋逃
也其地夙號難治守土者恒苦之定制縣境設有警團劃界以守警察之區四保衛團之

區七巡警團丁凡九百餘名各有長官若干員統率之均可保民緝匪之事其人率多土著所受官家餉糈甚微蓋半以保衛鄉里爲義務者故一聞告警銜命即行痛擊窮追不遺餘力每屆青紗幃起鬚匪尤恣橫嘯聚成羣盛者數達一二百分幫擾害劫擄頻仍警團於此時期咸不安寢饋四出勦捕嘗日出而相率以征星夜而不得休息其精壯者往往衝鋒陷陣前仆後繼槍林彈雨不稍反僱嗚呼自有警團以來死事者多矣或飲彈陣亡於當場或負創殞命於事後近三四年間尤復項相望踵相接時聞私祭夜泣之聲天下之至慘也其情可哀其志可敬其事又可歌可泣啓槐以謂作人處事當以血性義氣爲要素伊古忠臣義士孝子烈婦其人格完全事績優美流芳史冊傳述後世者無非此四字所造成善夫李文忠公之言曰大丈夫生世血性義氣不可一日磨滅否則人魔道矣治兵尤宜注重於此義爲主體勇次之必其人有血性義氣而後其勇趨於軌道始可用以集事即非勇者亦能奮勵殺敵致果夫好生惡死人之恒情以警團月得區區之餉糈或尙不足以爲事蓄之資苟非禦患捍災保衛鄉里大義所在職責攸歸孰肯以血肉

之軀體餉無情之槍彈彼匪徒冒險行劫奮身拒敵莫不强悍異常臨刑時亦多神色不變或長嘯高歌其人何嘗不勇特其勇而不義則適足爲害人殺身之具所謂已入魔道者矣啓槐守此有年凡警團殉難者皆專案請卹並及其遺族惟祀典闕然不足以慰幽潛而昭激勸爰將舊銀佛寺改爲義勇祠命警察所長全璞董其事取有案可稽者依次造具神主歲時致祭以妥忠魂籍塞吾悲修建經費均出自捐募並將輸捐姓名勒於石以彰好義工既竣巖爲記其梗概又因推論兵家要尙之所在云

雜著

勸民簡要論

知縣明亮

余觀經史之所載律例之所垂雖有萬語千言總爲北行俗美夫善不費錢積而成寶人亦何燁而不爲也忠孝自有慎勿欺慢而背君親節義雖無慎勿卑污而虧行止酒醪宜戒勿以沈湎而即昏狂色欲宜閑勿宜姦淫而傷風化財帛宜辦勿以貪婪而昧營求氣忿宜平勿以豪強而甘爭鬪煙魔宜遠勿以鴉片而戕生全他如賭博者乃爲破敗之媒

遊蕩者終入盜賊之藪又有深於忌刻習於凶頑工於唆調巧於坑陷種種惡孽歷歷招愆小則貽累身家親友訕笑大則有干法紀官府拘提屈辱公庭生死莫能自主哀憐獄吏恩威任其所如何等人身遭此魔障斯時回首已屬噬臍即或幸逃法網難免閻裏神嗔一切災害凶危半是陰陽果報興言及此可爲寒心莫若廣積陰功多行善事以衣冠禮樂之軀務士農工商之正道藝傳家可冀榮華富貴敦龐自守何由顛沛流離則樂業安居永保妻孥之完聚作德修福堪爲後嗣之儀型以著聲名以光門閭勉旃勿怠猗歟休哉

人民掩埋骸骨

照得開原所屬旗民村屯不下數百而每村屯附近必有浮厝棺木大處多者十餘小處少者亦五六蓋人死以入土爲安而生者以辦喪爲急奈何以相親之情忽忍而爲相棄之舉遂使孤棺久露致風雨之侵蝕而怨鬼無依爲地方之冥害甚至傷心道路穢氣薰聞何等人身遭茲狼藉以致精氣遊魂之擾上千陰陽天地之和凡水旱不調癘疫相傳

者未必不由乎此也而橐葬之家又豈能昌盛乎自示以後務令擇吉速葬而守堡鄉保等亦當實力稽察未可以數戶之不情而爲千家之隱累嗟乎掩骼埋齒皆仁人之事務民敬鬼本智者之爲修善獲福豈非美事乎凜之時諭

秘譜書屋宦銘

前
人

遠陶聖世少齒鄉譽出宰百里一命之榮河陽花盛單父琴鳴官小權重治國如烹

居官

研覈臧否夙夜屏營稱物平施不將不迎踈跂爲義蹙躡爲仁邪徑賊田惡政傷民

存心

發姦摘伏竦善抑惡鍛鍊之吏持心近薄徽纒叢棘菲履赭衣歸獄不解茲謂追非

刑名

既執刑柄復秉利權貪欲無藝攘奪矯虔已奉穀租又出橐稅暴斂橫征施及氓隸

錢穀

羽觴醕醑芳饌寄珍雕牆峻宇好爵是縻淫酗營肆酣歌墟邱甘酒嗜音伊于胡底
戒酒

纖腰駢舐嬌語詈諍聲如靜女喉若雛鶯管絃嘔啞蘭麝氤氳色授魂與意何云云

遠色

脂膏莫潤主玉無瑕廉約奉公勤儉成家侵牟萬民漁奪百姓賄賂公行不審不令

辦財

不受齒芥獨持風裁偃蹇驕傲如霆如雷平心靜氣增美釋回一言僨事嗟何及哉

懲忿

用財欲泰從諫如流闕疑闕殆寡悔寡尤願學魯山願學太邱布政優優百祿是求

制行

高懷壽月雅量春風束涇操切蕩滌一空跽跬爲詩誕謔爲文公餘集古以勗天君

消遣

求道說

良弼

今夫履巉巖之險而採玉於山條焉得之未嘗不以爲喜也冒風濤之危而採珠於海果然獲之未嘗不覺其快也若玉不於山而得之懷抱之內珠不於海而獲諸掌握之中其近且易如此爲幸更何如耶道之可貴也無異於珍寶其具於心不啻玉之在懷抱珠之在掌握也返而求之不出方寸而愚者怱然方且鑽研乎簡編之內馳騫於事務之間其致功也愈繁其去道也愈遠何弗思之甚也

太虛遊

前人

龍漢初劫安期生與白石生御風而行遊於太虛俯視下土見夫八紘之內紛紛籍籍仕者農者工者賈者爲師儒者爲將卒者與夫百家雜技各以其術鳴者總之所求不離二者名與利而已矣甚有富愈圖貲厚貴益謀位高者無厭之常情猶可說也更有觸目疚心不堪指數者如污廉爲貪報恩以怨婦子而忤親長盜賊而憎主人邪曲誣正藉訟庭以生財官吏容姦錮善士以索賂安期生喟然而嘆謂白石生曰是豈有不可已者乎衆

接無庶勞勞胡爲若是不情也白石生曰世固有不獲已者託業而必軌於正吾無責焉耳若夫可已不已悖理妄作是謂昧性昧則失其本真漸變而不可知矣子不見夫昆蟲與禽鳥乎鷹化爲鳩田鼠化爲鴛雀入大水爲蜃甚至變而又變化而又化如蠶化爲蛾蛾生子復化蠶當其未化固弗識其性也及其屢變如隔數世更不悟其本源矣人亦有之疾毒之性化蛇化蟒往籍所載不一而足機械既深良心盡失輾轉異類罪由自取烏足惜哉今吾與子俯仰乎寥廓之墟但葆此心湛然不昧而已彼下士之膠擾者非吾與子之責也又何嘆焉

董君頌

拔貢馬宗菊

維光緒三十一年歲在丁巳某月奉天開原縣附貢生董君少舒卒年七十以某月日葬於孟家屯之西阡在昔尼父教於洙泗不遺一老魯候誅之君習先聖之業弘養徒之風德之休明雖小重也不可以不述宗菊忝爲外孫曾親講貫乃作頌曰
於惟董君兆自軒轅純懿淑靈秉德之醇在幼能敬詩書是敦率禮不越而又有文卒以

學易成性性存存幽讚神明蘊啓乾坤彰往察來顯闡幽元樂飢衡秘嘉遯貞吉建立購
堂究習精一包蒙順巽所其無逸育我邑人授之道術有朋自遠以開百室惟昔三千堪
以爲比循循生徒彬彬文質成德達材有始有卒行歸于周既閑且估居賢善俗立懦廉
貪食之桑葢懷之好音非直豐學克廣德心小子有造其驟駸駸屬有夷患民失其居重
君明德不入其廬鄭公之鄉今亦有諸鄉鄰婦孺就之成都啓舍以容開倉以饋施而不
有里鄰歸譽直歲在己君子有終樂樂孤子哀哀吳穹哲人遽萎元空將封奉禮終沒永
悶幽宮小子服教企慕無窮悌廢德音作頌表崇重曰

於皇先生德通玄兮窺仞宮牆齊山淵兮五經無雙易莫先兮裁成吾黨樂斐然兮瞻恤
戚里無慳焉兮斯文在茲無傳賢兮大德必壽不假年兮百身莫贖以問天兮

威遠堡門

左 守 箴

威遠堡門在開原縣城東北邊境距邑三十里前清時最著名之邊門也門外即圍塲在
未開圍前老樹參天濃陰蔽日荒草迷離無人行徑居斯土者嘗懷戒心清時因其地東

圍場北界吉林所轄伊通縣邊疆地面遼廓保衛殊難盜出沒無常居民弗得安謐清室以邊境無備難免宵小作祟於是持築邊門着門兵駐守以資控衛門內持修章京衙署由京揀派文武章京各一員門丁數百名晝夜防堵以防疏虞自清光緒二十六年清廷持頒明令開闢圍場設縣治理人煙稠密地面安靖而是門守衛較前稍疏迨民國成立守門制度明令撤銷官兵亦隨之取締今則門址猶存而章京衙署又移作別用迥非昔日比矣